



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 171, Datë 15.06.2026

MBI

MIRATIMIN E DISA NDRYSHIMEVE NË VENDIMIN E BORDIT TË ERE-S NR. 197, DATË 15.08.2025 “MBI LICENCIMIN E SHOQËRISË “KËLCYRA 2020” SH.P.K. NË VEPRIMTARINË E PRODHIMIT TË ENERGJISË ELEKTRIKE NGA HEC “KLISYRË”, ME KAPACITET PRODHUES 2 MW”

Në mbështetje të nenit 16 të ligjit nr. 43/2015 “Për sektorin e energjisë elektrike”, i ndryshuar; neneve, 77-89 dhe 113 të ligjit nr. 44/2015 “Kodi i Procedurave Administrative i Republikës së Shqipërisë”; si dhe nenit 15 të Rregullores për organizimin, funksionimin dhe procedurat e ERE-s, miratuar me vendimin e bordit të Entit Rregullator të Energjisë (ERE) nr. 96, datë 17.06.2016; Bordi i ERE-s, në mbledhjen e tij të datës 15.06.2026, mbasi shqyrtoi relacionin me nr. 85/7 prot., datë 11.06.2026, si dhe informacionin shtesë me nr. 85/8, datë 12.06.2026, të përgatitura nga Drejtoria e Licencimit, Autorizimeve dhe Garancisë së Origjinës dhe Drejtoria Juridike dhe Zgjidhjes së Mosmarrëveshjeve “Mbi rishikimin e vendimit të bordit të ERE-s nr. 197, datë 15.08.2025 “Mbi licencimin e shoqërisë “KËLCYRA 2020” sh.p.k. në veprimtarinë e prodhimit të energjisë elektrike nga HEC “Klisyrë”, me kapacitet prodhues 2 MW”,

Konstatoi se:

- Bordi i ERE-s me vendimin nr. 197, datë 15.08.2025, ka vendosur të licencojë shoqërinë “KËLCYRA 2020” sh.p.k. në veprimtarinë e prodhimit të energjisë elektrike nga HEC “Klisyrë”, me kapacitet prodhues 2 MW, me vendndodhje në Zonën Kadastrale 2170, nr. pasurie 1071, Klisyrë, Tropojë, për një afat 30-vjeçar.
- Në dispozitivin e vendimit nr. 197/2025, ERE gjithashtu ka vendosur ndër të tjera *detyrimin për shoqërinë që përpara fillimit të operimit, shoqëria duhet të depozitojë në ERE lejen e përdorimit të burimit ujor për prodhimin e energjisë elektrike nga HEC “Klisyrë”, për kapacitetin 2 MW si dhe të dokumentojë në ERE ndërtimin dhe vënien në punë të HEC-it brenda datës 31.12.2025.*
- *Po ashtu me fillimin e operimit, por jo më vonë se 60 (gjashtëdhjetë) ditë nga ky fakt, shoqëria duhet të dokumentojë në ERE testimin e veprës si dhe brenda datës 01.01.2026, duhet të depozitojë marrëveshjen e rinovuar për shërbimet e kontabilitetit.*
- Me shkresën e protokolluar në ERE me nr. 2038/10 prot., datë 20.08.2025, Ministria e Infrastrukturës dhe Energjisë (MIE) ka bërë me dije se shoqëria ka kërkuar pajisjen me faturën e pagesës sipas VKM-së nr. 822/2025, të ndryshuar, për marrjen e miratimit përfundimtar për zgjerimin e kapacitetit të HEC “Këlsyrë” dhe me shkresën nr. 2462/1 prot., datë 24.04.2025, ajo ka sqaruar shoqërinë se, referuar pikës 2 të nenit 49 të ligjit nr. 43/2015, të ndryshuar me ligjin nr. 61/2020, miratimi për ndërtimin e kapaciteteve prodhuese të energjisë bëhet

nëpërmjet procesit konkurrues. Në fund të shkresës MIE sjell në vëmendje të ERE-s se nuk ka miratuar zgjerimin e kapacitetit të HEC-it ekzistues “Këlsyrë”.

- Në vijim të korrespondencës së zhvilluar me shoqërinë dhe MIE-n, bordi i ERE-s, me vendimin nr. 288, datë 13.11.2025, vendosi fillimin e procedurës për rishikimin e vendimit nr. 197/2025, me qëllim vlerësimin e fakteve dhe rrethanave të nevojshme që lidhen me aplikimin shoqërisë për licencim në veprimtarinë e prodhimit të energjisë elektrike dhe objektin e kërkesës së këtij aplikimi.
- Në mbledhjen e bordit të ERE-s të datës 12.12.2025, u referua informacioni nr. 2038/21 prot., datë 12.12.2025 dhe u konstatua se ishte e paqartë nëse shoqëria kishte paraqitur aplikim pranë MIE-s dhe ky ishte refuzuar nga ana e saj apo shkresa e MIE-s drejtuar shoqërisë dhe ato në vijim drejtuar ERE-s, referonin vetëm legjislacionin përkatës në fuqi për ndjekjen e një procedurë të tillë.
- Në lidhje me sqarimin e rrethanave sa më sipër, u planifikuan disa seanca dëgjimore, ku për seancën dëgjimore të datës 09.12.2025, është lajmëruar shoqëria me shkresën nr. 2038/19 prot., datë 21.11.2025, dhe me e-mailin e datës 03.12.2025 Ndërsa për seancën dëgjimore të datës 24.02.2026, të planifikuar të zhvillohej me përfaqësues të MIE-s dhe shoqërisë, janë dërguar shkresat nr. 2028/23 prot., datë 22.12.2025, nr. 85/1 prot., datë 14.01.2026, dhe shkresa nr. 67/1 prot., datë 18.02.2026. Në seancat e planifikuara nga ERE nuk janë paraqitur as përfaqësues nga MIE dhe as nga shoqëria.
- Ndërsa me shkresën nr. 627 prot., datë 12.02.2026, shoqëria “KËLCYRA 2020” sh.p.k. ka kërkuar informacion mbi vlefshmërinë e licencës. ERE, me shkresën nr. 627/1 prot., datë 18.02.2026, ka sqaruar shoqërinë, se sikurse është në dijeni, licenca e miratuar me vendimin nr. 197/2025 përmbante kushte të posaçme, të paplotësuara nga shoqëria, veçanërisht kushtin për fillimin e operimit të centralit.
- Për gjithë sa më sipër dhe me qëllim përfundimin e procedurës së nisur me vendimin nr. 288/2025, ERE, me shkresën nr. 85/3 prot., datë 24.03.2026, ka kërkuar nga MIE një qëndrim përfundimtar nëse shoqëria kishte paraqitur aplikimin për zgjerimin e kapacitetit dhe nëse ekzistonte një vendimmarrje përfundimtare në lidhje me këtë aplikim.
- Me shkresën e protokolluar në ERE me nr. 85/4 prot., datë 07.05.2026, MIE ka konfirmuar se qëndrimi i saj mbetet i pandryshuar dhe se, bazuar në pikën 2 të nenit 49 të ligjit nr. 43/2015, të ndryshuar, miratimi për ndërtimin e kapaciteteve prodhuese të energjisë bëhet vetëm nëpërmjet procesit konkurrues. Ky qëndrim i është vënë në dispozicion dhe shoqërisë nëpërmjet shkresës së ERE-s nr. 85/5 prot., datë 15.05.2026.
- Gjithashtu, evidentohet se shoqëria nuk ka përmbushur kushtet e vendosura në vendimin nr. 197/2025, pasi nuk ka depozituar dokumentacionin e kërkuar pranë ERE-s dhe nuk është paraqitur në seancat dëgjimore.

- Fillimi i efekteve juridike të vendimit nr. 197/2025 ishte i kushtëzuar me depozitimin e lejes së përdorimit të burimit ujqor, dokument i cili nuk rezulton të jetë depozituar, ndaj kushti ndalues mbetet në fuqi dhe licenca nuk ka filluar ende efektshmërinë e saj.
- Së fundi, në ERE është depozituar shkresa e shoqërisë “KËLCYRA 2020” sh.p.k., protokolluar me nr. 85/6 prot., datë 11.06.2026, me anë të së cilës shoqëria shprehet se do t’i drejtohet MIE-s për ish-HEC Këlcyrë, pasi nuk është me koncesion, por është privatizuar dhe se mbetet në dispozicion të ERE-s për të ofruar çdo dokumentacion ose sqarim të mëtejshëm që mund të nevojitet, por nuk rezulton që bashkëlidhur të jetë depozituar ndonjë dokument që të afektojë këtë vendimarrje.
- Aktualisht, pas marrjes së qëndrimit të MIE-s, dokument që nuk disponohet në momentin e licencimit, si dhe në mungesë të argumenteve apo dokumenteve shtesë nga shoqëria dhe për shkak të mospjesëmarrjes së saj në seancat dëgjimore, vlerësohet se jemi në kushtet e rishikimit të vendimit nr. 197/2025, ku pika 6 e tij parashikon rishikimin në rast të mosplotësimit të kushteve të përcaktuara apo depozitimit të akteve të ndryshme nga ato që kanë shërbyer për marrjen e vendimit, dhe konkretisht ndryshimin e pikës 1 të tij, duke refuzuar kërkesën e shoqërisë për licencim. Me ndryshimin e vendimit si më sipër vlerësohet se pikat 2,3,4,5 dhe 6 të vendimit shfuqizohen.
- Në nenin 113 të ligjit nr. 44/2015 “Kodi i Procedurave Administrative i Republikës së Shqipërisë” parashikohet se një akt administrativ mund të ndryshohet nga organi kompetent me një akt të ri me shkrim.
- Me ndryshimin e këtij vendimi, licenca dhe çdo akt tjetër i nxjerrë në zbatim të tij bëhen të pavlefshme.
- Në nenin 37, pika 6, gërma “b” të ligjit nr. 43/2015 “Për sektorin e energjisë elektrike”, i ndryshuar, dhe në nenin 4, pika 3, gërma “b” të “Rregullores për procedurat dhe afatet për dhënie, modifikimin, transferimin, rinovimin, njohjen dhe heqjen e licencave në sektorin e energjisë elektrike”, miratuar me vendimin e bordit të ERE-s nr. 109, datë 29.06.2016, e ndryshuar, parashikohet se prodhuesit e lidhur me rrjetin kombëtar me kapacitet të instaluar deri në 1 MW nuk janë të detyruar të pajisen me licencë për prodhimin e energjisë elektrike.

Për gjithë sa më sipër, bordi i ERE-s,

Vendosi:

1. Miratimin e disa ndryshimeve në vendimin e bordit të ERE-s nr. 197, datë 15.08.2025, si vijon:
 - a) Pika 1 e vendimit të bordit të ERE-s nr. 197, datë 15.08.2025, *ndryshon dhe bëhet:*
 1. *Të refuzojë kërkesën e shoqërisë “KËLCYRA 2020” sh.p.k. për licencim në veprimtarinë e prodhimit të energjisë elektrike nga HEC “Klisyrë”, me kapacitet prodhues 2 MW, me vendndodhje në Zonën Kadastrale 2170, nr. pasurie 1071, Klisyrë, Tropojë, për një afat 30-vjeçar.*

b) Pikat 2, 3, 4, 5 dhe 6 të vendimit nr. 197, datë 15.08.2025, *shfuqizohen*.

2. Me ndryshimin e vendimit si më sipër, licenca dhe çdo akt tjetër i dalë në zbatim të tij bëhen të pavlefshme.

3. Drejtoria e Licencimit, Autorizimeve dhe Garancisë së Origjinës, të njoftojë shoqërinë “KËLCYRA 2020” sh.p.k, Ministrinë e Infrastrukturës dhe Energjisë, OSSH sh.a., FTL sh.a. dhe ALEPX sh.a., për vendimin e bordit të ERE-s.

Ky vendim hyn në fuqi pas botimit në Fletore Zyrtare.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes dijeni të vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI